

OLDE HEIBELSTREEK

Brief van Gradus an z'n bruur in Canada

Beste bruur Bertus,
Stel dat d-r tijdens de ver-
gangen raodsvergadering
van Olde Heibelstreek in 't
kader van Paosen iemand
had gezegd: "Wie van ow
zonder zonden is, werpe
de eerste steen." Dan was
d-r gin kei deur de raods-
zaal gevloagen. Met 'n
flinke portie botter op de
kop stuurde de raad de wetholders naor huus. Ze hadden
ook graag de burgemeister weggestuurd. Dat kon echter
neet umdaj dat eerst mot melden an de Commissaris van
de Koning. Ze kenden de gemeentewet nog neet ens. Dat
beloaft wat as uut dit zootje ongeregeld de ni-je wetholders
motten worden gekoazen. Dut mien denken an: "Van de re-
agen in de drup." 't Grootste gedeelte van de raad is immers
op z'n minst mede verantwoordeluk veur disse chaos. I-j
kunt natuurluk wel iemand van butenaf halen as wetholder.
Den mot dan wel 'n liefhebber zun van eigeskwelling. Zal
leuk zun binnenköt is nao te vraogen welke enorme bult
wachtgeld d-r betaald mot worden.



Inmiddels het Hans Alberse eiges besloaten um 't zinkende
schip vaarwel te zeggen. Ik vond de burgemeister altied
wel 'n aardige man. Meer zon lieve onderwiezer den gin
orde kon hollen in 'n klas met dwarse blagen. D-r mot now
tiedeluk 'n vervanger kommen. 'n Duzendpoot den 't zaakje
weer liek op de diek kan krieggen. Zon fenomeen besteet
neet of zal z'n reputatie neet te grabbel willen gooien in
Olde Heibelstreek. As tiedelukke vervanger van de burge-
meister zol ik mevrouw Verstand veurstellen. Zi-j het al in
de beerput geroerd en is dus gewend an de stank. Wat mien
echter 't meest krang zit is dat twee wetholders uut de veu-
rige raodsperiode now helemaal buten schot bliieven. Hun
koj vaak neet verwieten dat ze deskundig waren. Zi-j waren
toch 't meest verantwoordeluk veur 't feit dat 't budget veur
de DRU met maor liefst 20 miljoen werd oaverschreden.
Toen begon 't schaop te drietten. 't Vervealende van som-
mige erfenissen is daj ze neet kunt weigeren. De wetholders
werden weggestuurd umdat ze de raad neet serieus namen
en zonder hun wat beslisten. Grote vraog is now of d-r nog
luj te vinden zun die de oavergebleven ruziemakers in Olde
Heibelstreek wel serieus nemmen.

Groeten an Ans en de blagen van ow bruur, Gradus Klets